

STARFSREGLUR

fyrir svæðisskipulagsnefnd sveitarfélaganna á Vestfjörðum.

I. KAFLI

Markmið og skipan nefndarinnar.

1. gr.

Sveitarfélögin á Vestfjörðum; Árneshreppur, Kaldrananeshreppur, Strandabyggð, Reykhólahreppur, Vesturbyggð, Tálknafjarðarhreppur, Isafjarðarbær, Bolungarvíkurkaupstaður og Súðavíkurhreppur, á vettvangi Fjórðungssambands Vestfirðinga (FV), hafa komið á fót svæðisskipulagsnefnd sem hefur það hlutverk að vinna tillögu að svæðisskipulagi fyrir sveitarfélögin, fjalla um breytingar á því og annast lögbundna endurskoðun. Nefndin starfar í umboði og undir yfirstjórn hlutadeigandi sveitarfélaga, sbr. ákvæði 3. mgr. 22. gr. skipulagslaga nr. 123/2010. Fjórðungssambandi Vestfirðinga er falin verkefnastjórn svæðisskipulags Vestfjarða, en samkvæmt samningi milli Fjórðungssambands Vestfirðinga (FV) og Vestfjarðastofu ses. fer Vestfjarðastofa ses. með framkvæmd verkefna fjórðungssambandsins. Sviðsstjóri byggðapróunar Vestfjarðastofu er starfsmaður nefndarinnar.

Markmið svæðisskipulagsins voru sett fram í ályktun 67. Fjórðungspings Vestfirðinga að hausti, í október 2022:

svæðisskipulagið marki megin stefnu og langtímaframtíðarsýn í umhverfis- og byggðamálum Vestfjarða, þar sem hagsmunir sveitarfélaganna fari saman til að stuðla að uppbyggingu Vestfjarða sem landfræðilegri, hagrænni og félagslegri heild sem styrkir byggðapróun á Vestfjörðum til framtíðar.

Helstu verkefni/málaflokkar sem unnið verður að, verða tilgreind í lýsingu sem svæðisskipulagsnefndin mun taka saman. Stefna sem á þessu byggist verður sett fram í svæðisskipulaginu. Stefnt skal að því að setja fram aðgengilegar upplýsingar um sérkenni svæðisins með skýrum hætti. Við svæðisskipulagsgerðina skal svæðisskipulagsnefndin vinna með sjálfbærni til grundvallar stefnumörkun í öllum málaflokkum. Skipulaginu er jafnframt ætlað að stuðla að aukinni samvinnu ólíkra aðila til eflingar svæðisins, samfélagslega, efnahagslega og umhverfislega.

2. gr.

Sveitarstjórnir á Vestfjörðum, samkvæmt 1. gr., skipa allt að tvo fulltrúa hver í nefndina og allt að tvo til vara.

Hver fulltrúi, sbr. 1. mgr., fer með eitt atkvæði á fundum.

Ef sveitarstjórnir eru ekki skipaðir fulltrúar í svæðisskipulagsnefnd er þeim heimilt að sitja fundi nefndarinnar, með málfrelsi og tillögurétt án atkvæðisréttar, sbr. 2. mgr. 55. gr. sveitarstjórnarlaga nr. 138/2011.

Svæðisskipulagsnefnd er heimilt að búa til minni starfs- og framkvæmdahópa innan nefndarinnar til að vinna að einstökum verkþáttum á milli funda.

Svæðisskipulagsnefnd er heimilt að bjóða öðrum að sitja einstaka fundi nefndarinnar eða taka þátt í vinnslu afmarkaðra þátta vinnunnar, eftir því sem nefndin telur best þjóna viðfangsefnum sínum hverju sinni.

II. KAFLI

Hlutverk nefndarinnar.

3. gr.

Svæðisskipulagsnefndin kýs sér formann og varaformann. Nefndin felur starfsmanni svæðisskipulags Vestfjarða hjá Vestfjarðastofu að rita fundargerðir og annast tilheyrandi frágang og aðra umsjón með nefndarstarfi.

Meðan svæðisskipulagið er í gildi skal svæðisskipulagsnefnd skipuð að loknum hverjum sveitarstjórnarkosningum. Fulltrúar þess sveitarfélags sem síðast fór með formennsku í nefndinni boða til fyrsta fundar hennar að loknum sveitarstjórnarkosningum í samráði við starfsmann svæðisskipulags Vestfjarða.

4. gr.

Hlutverk svæðisskipulagsnefndar er að annast vinnslu, kynningu og afgreiðslu svæðisskipulagsins og umhverfismats áætlunarinnar undir yfirstjórn viðkomandi sveitarstjórna. Hins vegar, eftir staðfestingu svæðisskipulagsins, er hlutverk nefndarinnar að sjá um framfylgd og breytingar á svæðisskipulaginu. Í starfi sínu tekur svæðisskipulagsnefnd mið af landsskipulagsstefnu auk markmiða svæðisskipulagsins sjálfs og þróunar í sveitarfélögunum.

Skipulagsákvæðanir svæðisskipulagsnefndar eru háðar samþykki allra hlutaðeigandi sveitarstjórna.

III. KAFLI

Starfshættir nefndarinnar.

5. gr.

Vinna svæðisskipulagsnefndar felst m.a. í því sem hér segir: Nefndin tekur saman lýsingu á skipulagsverkefninu í upphafi svæðisskipulagsvinnunnar, sbr. 1. mgr. 23. gr. skipulagslaga, þ.m.t. lýsingu á umfangi og nákvæmni upplýsinga í umhverfisskýrslu, sbr. 14. gr. laga um umhverfismat framkvæmda og áætlana nr. 111/2021. Nefndin leitar samþykkis sveitarfélaganna á lýsingunni. Að því loknu kynnir nefndin lýsinguna opinberlega og leitar samhliða umsagna Skipulagsstofnunar og valinna umsagnaraðila. Því næst vinnur nefndin svæðisskipulagstillögu og umhverfisskýrslu í samræmi við fyrirliggjandi lýsingu.

Nefndin kynnir svæðisskipulagstillögu ásamt umhverfisskýrslu fyrir almenningi, leggur hana fyrir hlutaðeigandi sveitarstjórnir til samþykktar og sendir hana að því loknu til athugunar hjá Skipulagsstofnun. Að lokinni athugun Skipulagsstofnunar er tillagan auglýst í samræmi við ákvæði 24. gr. skipulagslaga og gefinn frestur til athugasemda.

Að lokinni kynningu samkvæmt 24. gr. skal nefndin fjalla um tillöguna á nýjan leik og taka afstöðu til athugasemda sem hafa borist og þess hvort gera skuli breytingar á tillögunni, sbr. 25. gr. skipulagslaga. Þá skal senda tillöguna til sveitarstjórna og vinna að öðru leyti í samræmi við ákvæði 25. gr. skipulagslaga um málsmeðferð.

Sama málsmeðferð á við þegar um breytingu á svæðisskipulagi er að ræða.

6. gr.

Á vinnslutíma svæðisskipulagstillögunnar skal halda fundi í svæðisskipulagsnefnd eftir því sem þörf krefur, að jafnaði þó eigi sjaldnar en á tveggja mánaða fresti. Heimilt er að halda fundi nefndarinnar í fjarfundi, framkvæmd fundarins fer samkvæmt auglýsingu um leiðbeiningar um fjarfundi sveitarstjórna nr. 1182/2021.

Eftir staðfestingu svæðisskipulags, fundar nefndin eftir þörfum. Þó skal nefndin koma saman að loknum hverjum sveitarstjórnarkosningum og meta hvort ástæða sé til að endurskoða svæðisskipulagið og tilkynna Skipulagsstofnun um niðurstöðu sína, sbr. 26. gr. skipulagslaga.

Telji nefndin þörf á endurskoðun svæðisskipulags gerir hún rökstudda tillögu um það til hlutaðeigandi sveitarfélaga. Samþykki allra sveitarfélaga þarf áður en ráðist verður í endurskoðun svæðisskipulags.

Fundargerðir eru ritaðar á fundum svæðisskipulagsnefndar og staðfestar af fundarmönnum á fundi eða í kjölfar hans með rafrænni undirritun. Fundargerðir eru sendar hlutaðeigandi sveitarstjórnnum sem leggja þær fram til afgreiðslu á næsta fundi sveitarstjórnanna.

Formaður nefndarinnar, eða starfsmaður nefndarinnar fyrir hans hönd, boðar til funda með a.m.k. þriggja daga fyrirvara. Tillaga að dagskrá fylgir fundarboði. Boðun með tölvupósti er fullgild, en ganga skal eftir staðfestingu nefndarmanna um mætingu. Fundur er lögmætur ef formaður eða varaformaður og helmingur nefndarmanna eru viðstaddir. Leitast skal við að ná samkomulagi um ákvæðanir og afgreiðslur svæðisskipulagsnefndarinnar. Takist það ekki ræður afl atkvæða. Þó getur nefndin ekki ályktað um mál sem varða sérstaklega hagsmuni eins sveitarfélags að fulltrúum þess fjarstöddum.

IV. KAFLI

Kostnaður við störf nefndarinnar o.fl.

7. gr.

Fjórðungssamband Vestfirðinga (FV) gerir samning við Vestfjarðastofu ses. um verkefnastjórn svæðisskipulags Vestfjarða. Fjórðungssamband Vestfirðinga gerir skriflega samninga við aðra utan- aðkomandi ráðgjafa á grundvelli áherslna svæðisskipulagsnefndar og stjórnar fjórðungssambandsins. Kostnaður vegna svæðisskipulags Vestfjarða greiðist sem hér segir:

framlagi sveitarfélaga sem standa að gerð svæðisskipulags,
samningi um áhersluverkefni sóknaráætlunar Vestfjarða,
framlögum Fjórðungssambands Vestfirðinga og Vestfjarðastofu ses. samkvæmt fjárhags-
áætlun eða endurskoðaðri fjárhagsáætlun,
með mótframlagi frá Skipulagssjóði, samkvæmt samningi við sjóðinn.

Verkefnið greiðir kostnað vegna þátttöku fulltrúa í svæðisskipulagsnefnd, þ.e. fyrir fundar-
þátttöku og akstur. Árlegur kostnaður vegna starfa nefndarinnar eftir gildistöku svæðisskipulags
greiðist með framlagi sveitarfélaga sem að svæðisskipulaginu standa. Einnig er heimilt að leitast eftir
samningi við sóknaráætlun Vestfjarða um framlag til að mæta árlegum kostnaði eftir gildistöku
svæðisskipulags.

Kostnaður vegna breytinga sem afmarkast við einstök sveitarfélög, undirbúningur þeirra og
kynning, greiðist, eftir staðfestingu svæðisskipulagsins, af viðkomandi sveitarfélagi eða sveitar-
félögum sameiginlega þegar við á, í samræmi við íbúafjölda. Ekki er gert ráð fyrir að vinnuframlag
stofnana sveitarfélaganna, s.s. vegna gagnaöflunar og samræmingarvinnu, verði reikningsfært heldur
beri hvert sveitarfélag kostnað vegna þess.

V. KAFLI

Gildistaka.

8. gr.

Starfsreglur þessar, sem settar eru samkvæmt 4. mgr. 9. gr. skipulagslaga nr. 123/2010, hafa
einnig hlotið samþykki sveitarstjórna allra hlutaðeigandi sveitarfélaga sem aðild eiga að svæðis-
skipulagi Vestfjarða sem og athugasemdalaus umsögn Skipulagsstofnunar, sbr. 4. mgr. 2.6. gr. í
skipulagsreglugerð nr. 90/2013, öðlast þegar gildi.

Þannig samþykkt á fundi svæðisskipulagsnefndar Vestfjarða, 15. maí 2024.

Lilja Magnúsdóttir formaður.

B-deild – Útgáfudagur: 5. júní 2024